

PRIKAZ KNJIGE

Sedam tajni uspjeha

Jednostavan i praktičan vodič za uspjeh dr. Kenana Crnkića trenutni je ljetni hit izdavača Dobra knjiga

Tamo gdje najviše pisaca i autora ispisuju posvetu, Kenan Crnkić je zaljepio ogledalo i napisao: Ovdje vidite osobu koja je odgovorna za vaš uspjeh! *Sedam tajni uspjeha* knjiga je na stotinjak stranica, jednostavan i praktičan vodič za uspjeh, koji je trenutni ljetni hit na štandovima i policama izdavača Dobra knjiga. Autor je pak uspješan domaći ekonomista, predavač na Ekonomskom fakultetu u Sarajevu sa dugogodišnjim iskustvom u praksi i nemalim brojem priznanja među kojima valja istaći prošlogodišnju specijalnu nagradu za poseban doprinos nauci koja mu je dodijeljena u Oxfordu (Velika Britanija), gdje je sjedište Sokratovog komiteta, a tu su i laskava menadžerska priznanja, među kojima i menadžer decenije za Jugoslovensku Evropu.

Dr. Crnkić je vlasnik akreditovane MBA titule stečene na University of Delaware, specijalističke studije uspješno je okončao na Harvard Business School (Sjedinjene Američke Države), s nepunih 26 godina postao je generalni direktor Prizme koja je pod njegovim vodstvom od sedam godina

dogurala do epiteta najbolje kompanije u Evropi i jedne od 50 najboljih u svijetu, a trenutno je predsjednik Evropskog komiteta za poduzetništvo. Sretno je oženjen i ima jedno dijete. Njegova životna priča počinje u Zenici, no proputovao je cijeli svijet i učio. Direktor Prizme postao je s nepunih 26 godina.

– Govorio sam dobro engleski i njemački. Prizma je imala sjedište u Mostaru, bila orijentirana na Hercegovinu, jedna od najmanjih u to vrijeme. Međutim, meni je to bio izazov. Otišao sam da živim u Mostar i ostao dvije godine bez ikakve garancije da ćemo preći u Sarajevo. Vodio sam Prizmu sedam godina i kada sam predao dužnost, bila je po svim kriterijima najveća i najbolja. U međuvremenu sam upisao magistarski program, koji je bio osnovan od američke Vlade pa su me oni pomagali, taj dupli MBA i naš Ekonomski fakultet u Sarajevu. I doktorirao sam, sve radeći. Nakon sedam godina uradio sam nešto što je poprilično neuobičajeno u našoj zemlji. Sam sam odstupio s pozicije i prešao u Upravni odbor. Naprosto sam osjetio da sam ispunio neku svoju misiju. Nisam



Foto: A. KAJMOVIĆ

više imao nikakvog izazova. Ljudi koji su bili moji zamjenici sedam godina, bili su kompetentni da rade, a iako su se malo bojali u startu, evo već dvije godine funkcionišu veoma dobro, čime se ponosim, kaže Kenan koji je nakon svih nagrada i priznanja odlučio svoj recept za uspjeh podijeliti. Tako je nastala knjiga u kojoj se uče lekcije kakvih nema u školama i na fakultetima.

– Mi ne učimo kako se postaje uspješan. Učimo masu drugih stvari, a nekako smo potisnuli principe koji su uvijek bili prisutni, a koji su važni: jedna od mojih tajni je – zauzmi ispravan stav. Možda je to nešto što je najpotrebnije mladim ljudima Bosne i Hercegovine, ali i društvu. Strašno smo negativno nastrojani, po svakom pitanju. Informatičari imaju jednu izreku: ako smeće ula-

zi unutra, smeće mora izaći vani. Mi stalno i iznova pričamo loše o nekome, nedovoljno afirmišemo pozitivne primjere. Jeste kod nas situacija teška, ali nije nigdje u svijetu idealna. Možda je najveća privilegija koju sam imao u ovom mom poslu, ta što mi je Bog dao mogućnost da proputujem cijeli svijet. I svugdje je čovjeku teško. I svugdje ima ljudi koji su uspješni i onih koji to nisu. Baš zato smatram da je stav, a oko toga se slaže većina autora, daleko najvažniji razlog uspjeha ili neuspjeha, objašnjava Kenan u čijoj je kancelariji na zidu Churchillova rečenica: Stav je sitnica koja čini ogromnu razliku. On je svoj stav izabrao i ta mu je sitnica pomogla da ne samo postane uspješan već i da se radije tuđim uspjesima. Zato je svoje iskustvo podijelio sa svima koji hoće da čitaju. (VS.)



IZLOŽBA FOTOGRAFIJA SPASIOCI

Udruženje za postkonfliktna istraživanja je u sedam bh. gradova postavilo izložbu pod nazivom *Spasioci* koja veliča obične ljude koji su nekome pritekli u pomoć. Posebno se ove priče odnose na ljude koji su pritekli u pomoć svojim komšijama, prijateljima ili neznancima, svim onim "drugima" kojima nije bilo popularno pomagati u ratu. Izložba je zamišljena tako da građani sami posmatraju priče ovih ljudi i da se animiraju kako bi propitali u kakvom se mi stanju danas nalazimo i da li bismo i sami bili spremni postati nečiji spasilac.



IZLOŽBA O NEDŽADU IBRIŠIMOVIĆU

U okviru ramazanskog salona knjige su ispred BBI centra izložene skulpture i knjige Nedžada Ibrišimovića. Jedan od najvećih bh. pisaca će ostati upamćen po književnim djelima koja su bh. književnost digla na viši nivo, ali i po jedinstvenim radovima koji su osvježili bh. skulptorsku scenu, djelima koja su izgledom neklasična, ali vrijednošću klasična. Građani Sarajeva su ispred BBI centra mogli vidjeti snimke na kojima Ibrišimović čita svoja djela. Organizator postavke, Legološko udruženje je najavilo da će prirediti promociju knjige "Ruhani i šejtani inspiracije" koja ovih dana izlazi iz štampe. Na izložbi su, pored građana Sarajeva, bile mnoge poznate ličnosti.